

2

HARVARD COLLEGE LIBRARY  
FROM THE  
HARVARD-YENCHING  
INSTITUTE

AUG 30 1929

~~Ch L 9299.414~~  
~~Ch L 9301.414~~

2

廣博物志卷之二

哈佛大學哈佛燕京圖書館珍藏印

隴西董斯張纂

靜勝文庫

古汭夏 儀訂

天道二星

夫占變之道二而已矣二者陰陽之數也 易曰  
一陰一陽之謂道是故發於一成於二備於三  
周於四行於五懸象著明莫大於日月察變之  
動莫著於五星天之五星運氣於五行其初猶  
發於陰陽而化極萬二千五百二十五星之所

犯各以金木水火土爲占春夏秋冬伏見有時  
失其常離其時則爲變異得其時居其常是謂

吉祥

說苑

星之爲言精也陽之榮也陽精爲日日分爲星

故其字日生爲星

春秋說題辭

衆星布列體生於地精成於天列居錯峙各有  
攸屬在野象物在朝象官在人象神其以神差  
有五列焉是爲三十五名一居中央謂之北斗  
四布於方各七爲二十八舍日月運行歷示吉

凶五緝纏次用告禍福中外之官常明者百有  
二十四可名者二百二十爲星二千五百微星  
之數蓋萬二千五百二十庶物蠢蠢咸得繫命  
不然何得總而理諸

靈憲

常星猶公卿也衆星猶萬民也列星正則衆星  
齊常星亂則衆星墜矣

鹽鐵論

玉鈐云主命原由人之吉凶脩短於結胎受氣  
之日皆上得列宿之精其值聖宿則聖值賢宿  
則賢值文宿則文值武宿則武值貴宿則貴值

富宿則富值賤宿則賤值貧宿則貧值壽宿則壽值僂宿則僂

抱朴子

太微者太乙之庭也紫宮者太乙之居也軒轅者帝妃之舍也咸池者水魚之園也天阿者羣神之闕也

淮南子

大星一由旬小星二百步樓炭經云大星闊七百里中星四百八十里小星二十里星是諸天宮宅瑜伽論云諸星宿中其星大者十八拘舍其中者十拘盧舍其小者四拘盧舍

法苑珠林

五星反羽其下之國不可久處反羽光芒上大

下小狀如反羽

宋書

歲星其國齊其位東方蒼帝之十人王之象也

其色明而內寔暗天下安寧夫歲星所居國人

主有福不可加以兵歲星一曰攝提一曰重華

一曰應星一曰經星一曰脩人歲星動人主怒

無光仁道失歲星順行仁德加也歲星農官也

主五穀春不勸農則歲星盈縮所在之國不可

以罰小則民多病大則喜

天官星占

太白謂之太囂廣雅

太白位在西方白帝之子天將之象也一名天

相一名大正一名大臣一名大皓一名明星天官

星占

太白暉芒鷄必夜鳴火精光盛馬必晨驚劉子

熒惑主大鴻臚主死喪主司空又為司馬主楚

吳越以南又司天下羣臣之過司驕奢亡亂妖

孽主歲成敗廣雅

熒惑主夏位在南紘帝之子方伯之象也為天

候主歲成敗司察妖孽所往有兵為亂為賊為

疾為喪為饑為兵天官星占

孔子曰火上不可握熒惑斑變不可息志帝應

其脩無極此言熒惑火精尤史家所宜察也風俗

通

填星者黃帝之子女王之象也一名地候廣雅

鎮星主德女王之象也所居國有德不可以兵

加也天官星占

填星墜海水決黃星騁海水躍晉書

黃傳勿志

卷之二

四

高軍堂

辰星北方之位黑帝之子宰相之祥也一名安  
 調一名熊星一名鈎星一名伺晨主德常行四  
 仲當出不出天下旱色黃五穀熟色白中謀泄  
 色青大臣憂天官星古  
 辰星一名爨星一名伺星廣雅  
 凡五星盈縮失位其精降於地為人歲星降為  
 貴臣熒惑降為童兒歌謠嬉戲填星降為老人  
 婦女太白降為壯夫處於林麓辰星降為婦人  
 吉凶之應隨其象告晉書

五星者是日月之靈根天胎之五臟天地賴以  
 綜氣日月繫之而明東方歲星真皇君姓碧空  
 名澄淵字清凝夫人姓涵常名寶容字飛靈南  
 方熒惑真皇君姓渙空諱維淳字散融夫人姓陽  
 常諱華凝字玄羅太白真皇君姓皓空名德標  
 夫人姓颺英字靈恩辰星真皇君姓口口名肇  
 暉字積原夫人名玄華字龍娥鎮星真皇君名  
 藏睦字耽延夫人名空瑤字飛賢二十八宿為  
 籬落也織女水官星能致神芝食之壽與天地

無極傳舍水官星主天符南戒星同北戒水官  
 星且為馬晝為鹿暮為麋天市星天之倉曹神  
 能致明月珠且為木晝為兔暮為貉平門土官  
 星能致神女倡樂且為生木晝為豕暮為蜺輪  
 玄冥星姓冥樞諱定宜覺字法開度真名執天  
 之遊擊也主伐逆上總九天鬼神中領北帝三  
 官下監萬兆穀土星能致飛鳥來朱雀且為鷄  
 晝為烏暮為鳶積水星能致四方萬物恣其所  
 欲坐在立亡狼星能致天帝君百二十神雲笈七籤

春步七星名曰步二綱夏步七星名曰躡六紀

秋步七星名曰行六害冬步七星名曰登六絕

北極五星一名天極一名北極其第一星為太

子第二星最明者為帝第三為庶子餘二後宮

屬也並在紫微宮中央故謂之中極其占明大

則吉若變動則有憂大象列星圖

主有九辰華君中有九皇夫人竟精魄靈皆九

斗之威神吐煥七曜之光流映九天之門洞朗

幽虛無毫不彰也其星陽芒則為流金火鈴陰

芒則為豁落七元皆高上之靈策元始之威章  
 也能飛尺素之訣隱緯呂之中列帛華晨之下  
 羊雁禮天以招真則玄光曲照于盟場九晨下  
 降于靈宇夫人懽悅于寢席玄斗記名于隱書  
 有知此道存之便足以免大劫之會度洪災于  
 甲申也雲笈七籤  
 北斗君字君時一字克北斗神君本江夏人姓  
 伯名大萬挾萬二十石左右神人姓雷名機字  
 太陰主天下諸仙人又招搖與玉衡為輪北斗  
 之星精曜九道光映十天

東斗主擊君西斗主伐君中斗伏逆君紫微宮  
 內神姓柳字君明紫微君字露光夫人姓王諱  
 叔華太微星君字卿元太微內有三皇一曰皇  
 君二曰天皇三曰皇老此即三元之氣混沌之  
 真在太微總領符命也文昌星神君字先常天  
 子司命之符也土官星所主能致山內菓實且  
 為後晝為猴暮為死石璇璣星君字處行鈎陳  
 水星主之常陳天之虎賁也五車天之五嶽能



致甘露麒麟三台星天之陞官曰爲龍晝爲蛇  
暮爲魚三神者三台之靈也上台神君字顯真  
上台名虛精主金玉中台神君字章明中台名  
六淳主祿位中台兩星小潤晉張華爲司空死  
其星開下台神君字際生下台名曲生主土田  
軒轅星天之<sub>右</sub>妃<sub>上</sub>宮也其神且爲羊晝爲蟹  
暮爲鱉洞明星姓幽昇字幽韻真人星姓歸珩  
諱妙光字度元天之司空主五嶽靈仙

北斗第一星中名太上宮宮中有帝君變隱逃  
元內妃名太乙法怛字幸正扶著黃錦帔丹青  
飛翬顏雲髻第二星名中元宮宮中有帝君保  
胎化形內嬪名太乙三龕字羅朱嬰著赤錦帔  
綠羽飛翬顏雲髻第三星中名真元宮宮中有  
帝君六遁七隱上元丹母名太乙虛夷字仲雙  
兆著青錦帔繡羽華飛翬顏雲髻第四星中名  
紐幽宮宮中有帝君匿景藏光中元內妃名太  
乙七烈字橫單桀著紫錦帔黃華羽翬顏雲髻  
第五星中名網神宮宮中有帝君變體易景斗

中太女名太乙鬱書字疇丘蘭華朱錦帔紫青  
飛帔頽雲髻第六星中名紀明宮宮中有帝君  
隱迹散衆斗中中女名太乙氣精初字抱定陵著  
朱錦帔青繡飛帔頽雲髻第七星中名關會宮  
宮中有帝君分景萬形斗中少女名太乙都墨  
字天凡著朱錦帔青華明羽帔頽雲髻第八星  
中名帝席宮宮中有帝君化日日月水火斗中高  
皇左夫人名太乙石啓珠字落茂華著紫錦帔  
繡羽飛丹帔頽雲髻第九星中名上尊宮宮中  
有帝君化金石山河斗中高皇右夫人名太乙  
條字雲育著綠錦帔翠羽華帔頽雲髻

第一天樞星則陽明星之魂神也其星則號元  
斗宮魁精玄上真皇夫人姓明通諱嬰玄真名  
上精頭建飛雲華頽之髻餘髮散至腰衣紫黃  
青三色之襪帶九鈴之綬口恒吐青氣之光  
第二天璇星則陰精星之魂神也其星則號玄  
斗宮虛精上玄皇夫人姓玄鏡諱鬱勃光真名  
金歸頭建飛雲華頽之髻餘髮散至腰衣飛錦

羅扇鳳交錦帔帶靈飛紫綬口恒吐黑氣光之

第二天璣星則真人星之魄精也其星則號上  
精宮靈妃元皇夫人姓常明諱化雲真名流爛  
頭建晨嬰寶冠衣飛雲明光錦褱帶六山飛晨  
之綬口恒吐黃氣之精

第四天權星則玄冥星之魄精也其星則號綱  
極宮上虛神妃華皇夫人姓開生諱運明真名  
嬰關頭建七稱之冠衣緋羅鳳文之褱帶金真  
玉光口恒吐紫氣之精

第五玉衡星則丹元星之魄靈也其星則號紀  
明宮北上金蓋中皇夫人姓元方諱神武真名  
勃頭建紫晨飛華之冠衣九色之褱帶神虎玉  
文口恒吐白氣之光

第六闔陽星則北極星之魄靈也其星則號紫  
極宮安上晨華元皇夫人姓王元諱根華真名  
冥會頭建玉晨進賢之冠衣飛青羽褱帶流金  
火鈴口恒吐綠氣之精

第七搖光星則天關星之魄靈大明也其星則號

運天宮玉華靈皇夫人姓度元諱終會真名啓  
光頭建飛華顏雲之髻餘髮散至腰衣七色夜  
光雲錦之裾九色錦帔九天威靈玉策口恒吐  
赤氣之精

第八洞明星則輔星之魂精陽明也其星則號  
空真宮大明常皇夫人姓幽昇諱無韻真名空  
變頭建飛雲華顏之髻餘髮散至腰衣飛羅文  
襪帶九光之綬口恒吐青氣之精

第九隱元星則弼星之魂明空靈也其星則號  
元寶宮空玄變靈上皇夫人姓冥通諱萬先真  
名常陽頭建飛雲七稱玉冠衣青衣錦襪帶九  
光夜燭口恒吐黑氣之精

陽明星天之天尉司政主非上總九天上真中  
監五嶽飛仙下領後學真人天地神靈功過輕  
重莫不隸焉星圍九百二十里皆琉璃水精中  
有玉樹青寔金翅之鳥棲宿其上自生青精玉  
芝食之一口壽九萬年星有九門門有四光芒  
皆爛照九億萬里中上有青城玉樓據斗真人

廣輿記卷之二  
號曰太上宮青城玉樓九晨君姓上雲號法嬰  
容字董洞陽搖天槌頭建九晨玉冠衣青羽飛  
裳手執斗中玄圖坐玉樓之中有玄名玉錄當  
得知九晨君內諦

陰精星天之上宰主祿位上總天宿下領萬靈  
及學仙之人諸學道及兆民俗命祿位莫不隸  
焉星圍五百五十里亦皆琉璃水精中有玉樹  
甲寔金翅之所棲自生玄芝玉飴食之一口得  
壽五萬年星有五門門有四光芒爛照九億萬  
里中上有五色玉樓攀魁真人號曰中元宮五  
色玉樓北上晨君姓育嬰諦玄上瓮字昌陽文  
激明光頭建玄精玉冠衣玄羽飛裳手執五色  
羽節坐玉樓之中若有玄名朱臺當得知上晨  
君內諦  
真人星天之司空主神仙上總九天高真中監  
五嶽靈仙下領學道之人真仙之流莫不隸焉  
星圍七百七十里亦皆琉璃水精中有玉樹黃  
寔金翅之所棲自生黃精玉芝食之一口得壽

三千萬年星有十二門門有四光芒燭照九億  
萬里中上有黃臺玉樓真人號曰真元宮中黃  
臺玉樓主仙華晨君姓歸珽諱妙陰光字通度  
元度凝脂頭建飛晨寶冠衣青羽飛裳手執斗  
中青籙坐玉樓之中若有玄名方諸當得知華  
晨君內諱

玄冥星天之遊擊主伐逆上總九天鬼神中領  
北帝三官下監萬兆伐逆不臣諸凡內勃莫不  
隸焉星圍八百里亦皆琉璃水精中有玉樹赤  
寔金翅之所棲自生丹芝流瑛食之一口得壽  
八千萬年星有三門門有四光芒燭照九億萬  
里中上有朱臺玉樓出斗真人號曰紐幽宮中  
朱臺玉樓玄上飛蓋晨君姓冥樞諱定宣覺字  
法明度搖天柱頭建三華寶晨冠衣丹錦飛裳  
手執命靈之節坐玉樓之中若有玄名玉格當  
得飛蓋晨君內諱

丹玄星天之斗君三命錄籙上總諸天譜籙中  
統鬼神部目下領學真兆民命籙諸天諸地莫

不總統星圖七百二十里亦皆琉璃水精中有赤樹白寔金翅之所棲自生金精冶鍊之膏食之一口得壽七萬年星有七門門有四光芒爛照九億萬里中上有素臺金樓躡紀真人號曰網神宮中素臺金樓躡紀真人金魁七晨君姓上開諱冥通光字朱煥元變五道頭建七寶飛天冠衣白錦飛翥手執青元籙籙坐金樓之中若有玄名崑臺當得知七晨君內諱

北極星天之太常主昇進上總九天真一中統五嶽飛仙下領學者之身凡功勤得道輪轉階級悉總之焉星圖七百七十里亦皆琉璃水精中有黑樹白子金翅之所棲自生玄芝水瑛食之一口壽五萬年星有八門門有四光芒爛照九億萬里中上有玄臺玉樓步網真人號曰紀明宮中玄臺玉樓北晨飛華君姓羽靈諱長明化字淵洞源昌上元頭建飛精華冠衣紫錦飛裳手執九斗玉策坐玉樓之中若有玄名金臺當得知飛華君內諱

天關星天之上帝主天地機運如四時長養天地否泰劫會莫不隸焉星圖九百里亦皆琉璃水精中有二華之樹五色之實金翅之所棲生自然九味芝膏食之一口身生九色之光得壽九萬年星有一門門有九光芒爛照九億萬里中上有九層玉樓乘龍真人號曰關會宮九層玉樓總雲九元北蓋晨君姓玄樞諱轉光字會元終明天徒頭建九元寶冠衣九色錦裳手執暉神之章坐玉樓之中若有玄名九天帝圖玉籙當得知北蓋晨君內諱

輔星天尊玉帝之星也曰常常者常陽也至飛仙上總九天下領九地五嶽四瀆神仙之官悉由之焉星圖九百九十里亦皆琉璃水精中有青華之樹自有九音之字上有青鳥三足鳥生自然琉璃芝瑛食之一口得與玉帝同真星有八門交通八氣門有四光芒爛照九天之上中有紫氣玉樓遊行三命真人號曰帝席宮中紫氣玉樓帝尊九晨君姓精常號常無瓮字玄解子



廣博物志 卷之二 五 高明堂  
空正上開延頭建飛精玉冠衣九色衣手執火  
鈴坐玉樓之中若有玄名上清當得知帝尊內  
諱

彌星太帝真星也曰空空者恒空隱也主變化  
無方星圍九百九十里亦皆琉璃水精中有三  
華之樹自生九天玉章上有金口之鳳口銜火  
鈴中生自然七曜之暉得食暉一口與天帝同  
真星有九門交關九天門有四光芒燭照八極  
之外無央之中也中有玉臺紫館徘徊三陽真  
人號曰上尊宮中玉樓紫館帝真元晨君姓幽  
空諱空無先字隱元覺冥陽暉幽寥元頭建飛  
天王冠衣九天龍衣手執帝章坐紫館之中若  
有玄名九天當得知帝真內諱並上  
北斗七星星間相去九千里其二陰星不見者  
相去八千里也

徐整長曆

北斗亦有九星七見二隱其第八第九是帝皇  
太尊精神也霍光家有典衣奴子名還車忽見  
二星在斗中光明非常乃拜而還遂得增年六

百文門寶  
海經

北斗七星在太微北七政之樞機陰陽之元本也故運乎天中而臨制四方以建四時而均五行也魁四星為璇璣杓三星為玉衡又曰斗為人君之象號令之主也又為帝車取乎運動之義也又魁第一星曰天樞二曰璇三曰璣四曰權五曰玉衡六曰開陽七曰搖光一至四為魁五至七為杓樞為天璇為地璣為人權為時玉衡為音開陽為律搖光為星石氏云第一曰正

星主陽德天子之象也二曰法星主陰刑女主之位也三曰令星主中禍四曰伐星主天理伐無道五曰殺星主中央助四旁殺有罪六曰危星主天倉五穀七曰部星亦曰應星主兵又一主天二主地三主火四主水五主土六主木七主金又曰一主秦二主楚三主梁四主吳五主燕六主趙七主齊晉書

春斗為天關軫為地梁夏角為北鬮參為地地玉衡北兩星為玉繩王之為言溝刻也瑕而不

掩折而不傷

禮斗威儀

樞為雍州璇為冀州璣為青兗州權為徐揚州

衡為荊州開陽為梁州搖光為豫州

廣雅

東斗主笑西斗記名北斗落死南斗上生中斗

大魁總監眾靈

度人經

北斗魁第一星神名執一曰報陰第二星曰叶

請第三星曰視金第四星曰拒理第五星曰防

件第六星曰開寶第七星曰招搖

一曰始酉陽雜俎

中宮大帝其精北極星含元出氣流精生物也

文耀鉤

斗殞精王者孝行溢則見

宋書

次南斗君及七宿法老君名南斗君姓唐名龜

字宣道太原人次西斗君及七宿法老君曰西

斗君姓劉名起字石嬰長安人次北斗君及七

宿法老君曰北斗君姓陳名奉字百萬江夏人

云云在流珠中

雲笈七籤

老君曰左司命一人也姓韓名思字元信長樂

人也司錄司伐等屬焉左司命有三十六大員

官右司命姓張名獲邑字子良廣陽人也司隸司非等屬焉右司命亦有三十六大員官

上台星名虛精求之感帝王之夢及金玉念名求之必應中台星名六淳求官祿盛興念名求之必得吉遂下台星名曲生求妻妾奴婢念名求之必遂

甲從官陽神也角星神主之陽神九人姓賓名遠生衣綠玄單衣角星宿主之乙從官陰神也亢星神主之陰神四人姓扶名司馬馬頭赤身

衣赤緹單衣帶劍亢星神主之丙從官陽神也

氏星神主之陽神十三人姓王名師子衣青紗

單衣氏星神主之丁從官陰神也房神星主之

陰神八人姓洪名寄生衣絳緋單衣房星神主

之戊從官陽神也心星神主之心星火也爲工

故在東方陽神五人姓女名涂祖牛頭人身衣

黃單衣帶劍心星神主之巳從官陰神也尾星

神主之陰神十一人姓涂名徐澤兔頭人身衣

青單衣尾星神主之庚從官陽神也箕星神主

之桑木者其星之精也陽神十一人姓元闕名  
 仲衣飄颻玉紗單衣箕星神主之辛從官陰神  
 也南斗星神主之陰神四人姓陽名多衣青單  
 衣持矛南斗星主之壬從官陽神也牛星神主  
 之陽神十二人姓柳名將生衣絳玄單衣牛星  
 神主之癸從官陰神也女星神主之陰神四人  
 姓刁名徐字鬱子犬頭人身女星神主之寅從  
 官孟神也虛星神主之槐者虛星之精也孟神  
 四人姓木名徐他鼠頭人身衣銀黑單衣帶劍  
 虛星神主之卯從官仲神也危星神主之仲神  
 十一人姓劉名歸生衣瓊紋單衣帶劍危星神  
 主之辰從官季神也營室星神主之營室之內  
 五色襪神營室天子受命之司水官星神主之  
 季神八人姓呂名昇衣黃錦單衣營室星神主  
 之巳從官孟神也東壁星神主之孟神七人姓  
 石名蘇和豕頭人身衣黑單衣帶劍東壁星神  
 主之午從官仲神也奎星神主之仲神六人姓  
 黑名石勝衣丹紗單衣帶劍奎星神主之未從

宮季神也婁星神主之季神十三人姓竺名遠  
來衣流熒單衣婁星神主之申從官孟神也胃  
星神主之孟神八人姓馮名謝君衣流黃單衣  
帶劍胃星神主之酉從官仲神也昴星神主之  
仲神四人姓張名弩小衣綠青單衣昴星神主  
之戌從官季神也畢星神主之季神姓桑名公  
孫帶劍衣白毛單衣畢星神主之亥從官孟神  
也觜星神主之孟神十一人姓王名平衣龍青  
單衣觜星神主之子從官仲神也參星神主之  
仲神八人姓銅名徐舒衣黃緋單衣帶劍參星  
神主之丑從官季神也井星神主之季神九人  
名搏陽衣黃水單衣帶劍能致鳳皇玄武東井  
星神主之震乾之長男也鬼星神主之長男神  
五人姓作名涂于蛇頭黑身帶劍衣赤野單衣  
鬼星神主之坎乾之中子也柳星神主之中男  
神四人姓角名石襄羊頭人身衣黃芾單衣柳  
星神主之艮乾之少子也七星神主之少子神  
五人名勝子衣飛霞單衣七星神主之巽坤之

長女也張星神主之長女神五人姓李名神子  
 衣赤血單衣張星神主之離坤之中女也翼星  
 神主之中女神十人姓張名奴子衣赭黑單衣  
 帶劍翼星神主之兌坤之少女也軫星神主之  
 少女神五人姓蘇子衣流黃單衣軫星神  
 主之 並上

東方七宿一者角宿主於衆鳥二者亢宿主於  
 出家求聖道者三者氏宿主於水主衆生四者房  
 宿主行車求利五者心宿主於女人六者尾宿

主洲渚衆七者箕宿主於陶師南方七宿一者

井宿主於金師二者鬼宿主於一切國王大臣

三者柳宿主雪山龍四者星宿主巨富者五者

張宿主於盜賊六者翼宿主於商人七者軫宿

主須羅吒國西方七宿一者奎宿主行船人二

者婁宿主於商人三者胃宿主於婆樓迦國四

者昴宿主於水牛五者畢宿主一切衆生六者

觜宿主鞞提訶國七者參宿主於刹利北方七

宿一者斗宿主澆部沙國二者牛宿主於刹利

及安多鉢竭那國三者女宿主鴛伽摩伽陀國  
 四者虛宿主那遮羅國五者危宿主著華冠六  
 者室宿主乾陀羅國輪虛那國及諸龍蛇腹行  
 之類七者畢宿主乾闥婆善樂者大德婆伽婆

法苑珠林

爾時佉盧虱吒仙告一切天言初置星宿昴為  
 先首衆星輪轉運行虛空告諸天衆說昴為先  
 首其事是不爾時日天而作是言此昴宿者常  
 行虛空歷四天下恒作善事饒益我等知彼宿

屬於火天是時衆中有一聖人名大威德復作  
 是言彼昴宿者我妹之子其星有六形如似剃  
 刀一日一夜歷四天下行三十時屬於火天姓  
 鞞耶尼屬彼宿者祭之用酪復次置畢為第二  
 宿屬於水天姓頗羅墮畢有五星形如立叉一  
 日一夜行三十五時屬畢宿者祭用鹿肉復次  
 置觜為第三宿屬於月天卽是月天子姓毗黎  
 伽耶尼星數有三形如鹿頭一日一夜行十五  
 時屬觜宿者祭用根及果復次置參為第四宿



屬於日天姓  
 有一星如婦  
 宿者祭用醞  
 姓私失絺其  
 五時屬井宿  
 為第六宿屬  
 性溫和樂修  
 一日一夜行  
 蜜祭之復次

婆利失絺其性大惡多於嗔怒止  
 人厲一日一夜行三十五時屬參  
 翻復次置井為第五宿屬於日天  
 有兩星形如腳跡一日一夜行十  
 者以糝米華和蜜祭之復次置鬼  
 歲星六歲星之子姓炮波那毗其  
 善法其有三星猶如諸佛胸滿相  
 二十時屬鬼宿者亦以糝米華和  
 置柳為第七宿屬於地天即姓蛇

氏止有一星  
 如嬭人厲一日一夜行十五時屬

柳宿者祭用  
 乳糜右此七宿當於東門復次置

南方第一之  
 宿名曰七星屬於火天姓賓伽耶

尼其有五星  
 形如河岸一日一夜行三十時屬

此宿星者宜  
 用糝米烏麻作粥祭之復次置張

為第二宿屬  
 福德天姓瞿曇彌其星有二形如

人之腳跡一  
 日一夜行三十時屬張宿者將毗

羅婆果以用  
 祭之復次置翼為第三宿屬於林

天姓犒陳如  
 其有二星形如腳跡一日一夜行

十五時屬翼星者用青黑荳煮熟祭之復次置軫為第四宿屬沙毗黎帝天姓迦遮延蝎仙子其星有五形如人手一日一夜行三十時屬軫星者以莠稗飯而以祭之復次置角為第五宿屬喜樂天姓質多羅延尼乾闥婆子止有一星如嬾人麤一日一夜行十五時屬於角者以諸華飯而祭之復次置亢為第六宿屬摩訶羅天姓迦旃延尼其有一星如嬾人麤一日一夜行十五時屬亢星者當取藁荳和酥煮以用祭

之復次置氏為第七宿屬於火天姓些者利多耶尼一日一夜行三十五時屬氏宿者取種種華作食祭之右此七宿當於南門復次西方第一之宿其名曰房屬於慈天姓阿藍婆耶尼房有四星形如嬰珞一日一夜行三十時屬房宿者以酒肉祭之次復置心為第二宿屬帝釋天姓羅延那心有三星形如大麥一日一夜行十五時屬心星者以粳米粥而用祭之次復置尾為第三宿屬獵師天姓迦遮耶尼尾有七星形

如蠲尾一日一夜行三十時屬尾星者以諸果根作食祭之次復置箕爲第四宿屬於水天姓持义迦旃延尼箕有四星形如斗角一日一夜行三十時屬箕宿者取尼拘陀皮汁祭之次復置斗爲第五宿屬於火天姓摸伽邏尼斗有四星如人拓地一日一夜行四十五時屬斗宿者以粃米華和蜜祭之次復置牛爲第六宿屬於梵天姓梵嵐摩牛有三星形如牛頭一日一夜行於六時屬牛宿者以醍醐而用祭之次復置女爲第七宿屬毗紐天姓帝利迦遮耶尼女有四星如大麥粒一日一夜行三十時屬女宿者以鳥肉祭之右此七宿當於西門次復置北方第一之宿名爲虛星屬帝釋天娑婆天子姓憍陳如虛有四星其形如鳥一日一夜行三十時屬虛星者煮烏黃汁而用祭之次復置危爲第二宿屬多羅拏天姓單那尼一日一夜行十五時屬此宿者以粃米粥而用祭之次復置室爲第三宿屬蛇頭天蝎天之子姓闍都迦尼拘室

有二星形如腳跡一日一夜行三十時屬室宿者以肉血祭之次復置壁為第四宿屬林天婆婁那子姓陀難闍壁有二星形如腳跡一日一夜行四十五時屬壁星者以肉祭之次復置奎為第五宿屬富沙天性阿虱吒排尼奎有一星如嬾人廩一日一夜行三十時屬奎宿者以酪祭之次復置婁為第六宿屬乾闥婆天姓阿舍婆婁有三星形如馬頭一日一夜行三十時屬婁星者以大麥飯并肉祭之次復置胃為第七

宿屬閼摩羅天姓跃伽毗胃有三星形如昇足

一日一夜行四十時屬胃宿者以杭米烏麻及

野棗而用祭之右此七宿當於北門上

水星姓湍名炎字神靈火姓炎名九鼎字光天

木姓艾名用字道輝金姓魯名遂字德璋土姓

司名辯字道后日姓孫名開字子真月姓唐名

末字天賢計姓翁名若字天真烝姓高名華字

俊夫羅姓馬名玄字伯惟字忠名炎字忠應

五星合狼張晝視無日光虹蜺煌煌太山失金

鷄西岳亡玉羊太山失金鷄者箕星亡也箕者風也風動鷄鳴今箕候亡故鷄亦亡也西岳亡

玉羊者星在未為羊鷄失羊亡臣縱恣萬人愁

不祥易是類謀

鼎者天之耳也主西方故爾雅曰西陸鼎也宋書

火星與昴星出入昴星低時火星出昴星見時

火星伏非火之性厭伏昴也時偶不並度轉乖

也正月建寅斗魁破申非寅建使申破也轉運

之衡俱自應也論衡

箕為天口主出氣尾為逃臣賢者叛十二諸侯

列於庭詩況曆樞

有星守三淵大水地動海魚出天官占

維星散句星信則地動散者不相從也上

太白上公妻曰女媧居南明天下祀之曰明星

甘石星經

軫星逐鬼張星拘鬼東井還鬼抱朴子

魚星主理陰陽事知雲雨之期也故讚曰漢中

魚星知雲雨也占曰魚星明大河海水皆出謝承

後漢書

五車者五帝車舍也三柱一曰三泉天子得靈臺之禮則五車三柱均明有常

晉書

四輔四星在紫微宮中抱之細星此爲輔臣之位贊於萬機其占以小而明則吉若微闇則官不理也

鈎陳六星在紫微宮中華蓋之下天帝所居之宮亦護軍將軍之象占以明則吉

華蓋七星其柱九星合十六星如蓋狀在紫微宮中臨鈎陳以陰帝座占者正則吉若傾則凶也

女史一星在紫微宮內柱史北此嬪人之官掌記宮中之事占以明則爲記史直詞若不明則反是

柱下史一星在紫微宮內近尚書此左右掌記君之過其占以明則爲史直詞若不明則詞不依過無真寔也

尚書五星在紫微宮內東南之隅此八座大臣

廣博物志卷之二十一  
之象故讚曰尚書納言夙夜詔謀占以小而明則君臣和

宦者四星次帝座西南主侍者帝旁闈人也占以不明則吉若明則內臣專權

勢四星在太陽西北主刑餘人而用事者也占以不明為吉若明則闈宦用權

輔一星附北斗杓第六星大臣之象也占欲其小而明則吉若大而明則臣奪君政若小而不

明則臣不任職若明大與斗合者則國兵暴起也

五諸侯五星主刺舉戒不虞一曰帝師二曰帝

友三曰三公四曰博士五曰太史此五者常為

帝定疑議

東壁二星主文章天下圖書之祕府也星明王

者興道術行國多君子星失色大小不同王者

好武經士不用圖書隱星動則有土功

並上

進賢一星在平日西垣星明賢士用進暗小人

用星經

帝席三星在大角北星暗天下安星不欲明明則王公凶

女床三星在天紀北主後宮明則宮人自恣扶匡七星在天柱東主桑蠶之事

離珠五星在女北主藏府以御後宮移則亂璃瑜三星在秦代東南列北主王侯衣服

傳說一名太祝並註

織女星主瓜果元命苞

運斗樞云牽牛神名畧石氏星經云牽牛名天

關佐助期云織女神名收陰

河鼓一名三武荊州星占

匏瓜明則歲大熟上○又天文要集云匏瓜為天子果園

農丈人一星在南斗南主農正官也占明則為

豐稔若暗則為歉晉書

筆星星氣有一枝末銳似筆也釋名

咸池主五穀其星五者各以其職以精委為國

也元命苞

天有卷舌之星人有織口之銘劉子



昆弟有親親之恩則鉤鈴不離房考經內事○宋均曰鉤鈴遠房則踈闊今昆弟相親故相近也

帝命驗曰有人雄起戴玉英履赤矛鄭玄注曰赤矛瑞星名

瑞星有十二一曰景星二曰周伯三曰含譽四

曰王蓬芮五曰格澤六曰玄保七曰昭明八曰

昏昌九曰旬始十曰司危十一曰菟昌十二曰

地維臧光瑞星五行之冲和氣也五行順樂狂

相喜合之所生也周伯王蓬芮皆古者高世不

仕之人王其姓蓬芮其名周伯其姓字也其精

為星帝命之為瑞星然考之晉志瑞星止四星

其周伯又於客星見之無王蓬芮而客星則有

王蓬絮芮所至之國非福也而三家所言妖星

則別有蓬星焉曰蓬芮曰蓬絮芮曰蓬星其言

禍福不同豈各有據乎又晉志無玄保以下七

星其昭明司危地維臧光則皆為妖星若隋志

則因晉志而又無格澤疑當從晉志通志

天樞得則景星見衡星得則麒麟生萬人壽春秋

廣博物志 卷之二 三 高世生

運斗

作樂制禮得天心則景星見也

禮稽命圖

景星者天暉也狀如半月生於晦朔助月為明

王者不私人則見

暉音精孫氏瑞應書

歸邪如星非星如雲非雲或曰星有兩赤彗上

向有蓋下連星見必有歸國者昌光赤如龍狀

聖人起帝受終則見

晉書

祥氣昌光握譽可錯持勝履予

廣雅

妖氣格擇旬始倍譎天狗枉矢氛祲冠珥

若星與日並出名曰嫁女星與日爭光武且弱

文且強女子為王在邑為喪在野為兵

晉書

流星之類有音如炬火下地野雉鳴斯天傷也

所墜國安有喜流星色青赤名曰地雁其所墜

者起兵流星有光青赤曰天雁軍中之精華也

流星大如缶其光赤黑有喙者名曰梁星其所

墜之鄉有兵君失地飛星大如缶若瓮後皎然

白前卑後高此謂頓顛其所從者多死亡削邑

而不戰有飛星大如缶若瓮後皎然白前卑後

高搖頭乍上乍下此謂降石所下民食不足飛  
 星大如缶若瓮後皎然白星滅後白者曲環如  
 車輪此謂解銜其國人相斬為爵祿有飛星大  
 如缶若瓮其後皎然白長數丈星滅後白者化  
 為雲流下名曰十滑所下有流血積骨有飛星  
 大如缶若瓮後皎白縵縵然長可十餘丈而委  
 曲名曰天刑一曰天節將軍均封疆

歲星之精流為天棊天槍天猾天衝國皇及登  
 蒼彗災惑散為昭且蚩尤之旗昭明司危天僂  
 赤彗填星散為五殘獄漢大賁昭星絀流旬始  
 蚩尤虹蜺擊咎黃彗太白散為天杵天柎伏靈  
 大敗司姦天狗天殘卒起白彗辰星散為枉矢  
 破女拂樞滅寶繞綖驚理大奮祀黑彗並上  
 國有槍星其君必辱國有彗星必有流血浮丘  
 之戰彗之所出必服天下之讐管子

漢京房著風角書有集章所載妖星皆見於旁  
 互有五色方云以五寅日見各有五星所生云  
 天槍天根天荆真若天掖天樓天垣皆歲星所

生也見以甲寅其星咸有兩青方在其旁天陰  
晉若官張天惑天崔赤若蚩尤皆熒惑之所生  
也出在丙寅日有兩赤方在其旁天上天伐從  
星天樞天翟天沸荆彗皆填星之所生也出在  
戊寅日有兩黃方在其旁若星帝星若彗竹彗  
牆星棖星白藿皆太白之所生也出在庚寅日  
有兩白方在其旁天美天冕天社天麻天林天  
蒿端下皆辰星之所生也出以壬寅日兩黑方  
在其旁此三十五星卽五行氣所生皆出於月

左右方氣之中各以其所生星將出不出日數  
期候之當其未出之前而見見則有水旱兵喪  
饑亂所指亡國失地王死破軍殺將

文獻通考

凡妖星五行之乖戾氣也五行掩合陵犯怒逆  
鎔亂離散雜變之所生也字本黃帝時一女子  
脩行不得其死蚩尤則黃帝所誅者亦五行戾  
氣之所蓄結而爲之者也按申湏公羊杜預鄙  
璞俱以彗字爲一星左氏昭公十七年有星孛  
於大辰魯申湏曰彗所以除舊布新也公羊曰

孛者何彗星也文公十四年有星孛於北斗杜預曰孛彗也部璞釋爾雅曰彗妖星也亦謂之孛綜其實不然彗孛長三星其占畧同而其形少異孛星光芒短其光四出蓬蓬孛孛然彗星光芒長參之如掃帚長星光芒有一直或竟天或十丈或三十丈宋均注鉤命決曰彗五彗也蒼則王侯破天子苦兵赤則賊起強國恣黃則女害色權奪於后妃白則將軍逆二年兵大作黑則河決賊處處起史記彗出東井

分

景公以為憂晏子曰君高臺深池賦如弗得

刑罰恐弗勝孛星將出彗星何懼乎然則孛甚

彗也董仲舒曰孛者乃非常惡氣之所生也

率孛彗為除舊布新火災長星為丘革事上

旬始出北斗旁如雄雞其怒有青黑為伏鼈或

曰怒雌也王爭兵西晉書

東北有三大星出名曰女帛見則有大喪上

彗星無光假日之光故夕見則東指晨見則西

指正義

國有兵凶則星墜為鳥獸天下將亡則星墜為  
 飛垂天下大兵則星墜為金鐵天下有水則星  
 墜為土國主亡有兵則星墜為草木兵起國主  
 亡則星墜為沙星墜為人而言者善惡如其言  
 又曰國有大喪則星墜為龍

隋書

唐堯為政七十餘載然後景星摛耀

堯遭大水填星逆行入水府

大象賦注

仲尼曰吾聞堯率舜等遊首山觀河渚有五老  
 遊焉一老曰河圖將來告帝期二少曰河圖將

來告帝謀三老曰河圖將來告帝書四老曰河

圖將來告帝圖五老曰河圖將來告帝符龍御

王苞金泥玉檢封盛書咸曰知我者重瞳姚黃

五老因飛為流星上入鼎

論語識

帝堯時有五星自天而實一是土之精墜於穀

城山下其精化為圮橋老人歲星之精墜於荆

山化而為玉側而視之色碧正而視之色白下

和得之獻楚王火星之精墜於南海中為大珠

光照數百里紅氣亘天今名其地為珠池金星

之精墜於終南丰翠之西因號為太白山其精  
 化為白石狀如美玉時有紫氣覆之水星之精  
 墜於張掖郡柳谷中化為黑石漢之末漸有文  
 彩未甚分明魏青龍年忽如雷震聲聞百餘里  
 其石自立白色為文有牛馬僂人之狀及玉環  
 玉玦兼文字果應司馬氏為晉以符金德焉

記

錄異

虞舜在位十年有五老遊於國都舜以師道尊  
 之言則及造化之始舜禪於禹五老去不知所

從舜乃置五星之祠以祭之其夜有五長星出

薰風四起連珠合璧祥應備焉

拾遺記

張淵賦云嘉黃星之靡鋒明虞舜之不競

注舜將受

禪先有星見員而無鋒芒云揖讓而受不以兵事競也

桀末年而日並闕五星交錯枉矢流火神見闕

龍逢行黃圖諫不聽焚圖誅逢

路史

武王伐紂魚辛諫曰歲星在北方不北征

武王不

從 尸子

太公釣於磻溪夜夢北斗神告以伐紂之意

尚書

中侯

周將伐殷五星聚房齊桓將霸五星聚箕漢高入秦五星聚東井四星聚柳張而光武興復於

洛 宋志

周公黃錄記太白下為王公然歲星變為審壽

公等所見非一家 劉向列傳序

微子感牽牛星顏淵感中台星張良感弧星樊

噲感狼星老子感火星 劉子○佐助期云蕭何稟鼎星

周厲王時北斗與三台並流不知其所厲王沒

後兩主星復見 獨異志

莊公七年甲午四月辛卯夜恒星不見星隕如

雨即周莊王十年也遂即易筮之云西域銅色

人出也所以夜明非中國之災也 莊王別傳

周襄王不能事其母弟彗入斗亡其度 孝經鉤命訣

昔管仲與鮑叔牙商賈於南陽見三星聚虛危

之分知齊將有雷王遂共戮力來投齊地 觀象賦任

齊有彗星齊侯使祝禳之晏子曰無益也祇取

誣焉天道不諂不貳其命若之何禳之也且天



之有彗以除穢也君無穢也又何穢焉若德之穢禳之何益一作損詩云惟此文王小心翼翼昭

事上帝聿懷多福厥德不回以受方國君無違德方國將至何患於彗詩曰我無所監夏后及

商用亂之故民卒流亡若德之回亂民將流亡祝史之為無能補也公說乃止新序

按天官曰背水陣為絕紀向阪陳為廢軍武王伐紂背濟水向山阪而陣以二萬二千五百人

擊紂之億萬而滅商豈紂不得天官之陳哉楚將公子心與齊人戰時有彗星出柄在

在勝不可擊公子心曰彗星何知以彗鬪者因倒而勝焉明日與齊戰大破之尉繚子

秦始皇帝三十六年熒惑守心有星墜下至地為石刻其石曰始皇死而地分始皇聞之令御

史逐問莫服盡取石旁家人誅之因燔其石妖漢武帝祀甘泉至渭橋有女子浴於渭乳長七

尺上怪而問之女曰帝後第七車侍中知我所來時張寬在第七車對曰夫星王祭祀者齋戒

不嚴則女人星見益部者舊傳

東方朔太白星精黃帝時為風后堯時為務成

子周時為老子越為范蠡齊為鴟夷言其變化

無常也集仙錄

東方朔云天下無知我者唯曆官大伍公知之

帝召問之曰諸星在唯歲星不見西京雜記

武帝元狩中有日者奏太乙星不見帝召東方

朔問其由朔奏曰是星不見則遊於世為居民

福壽帝曰何以驗之朔曰陛下使人於江海之

濱設禮祭而迎之或乘舟或控鶴特異於常者

則為驗見則斫竹建壇醮謝之帝如奏朔日迎

之是月果有會稽太守奏海中有入羊角面如

玉色乘一葉紅蓮約長丈餘偃臥其中手持一

黃書自東海浮來臣等焚香迎拜俯及百步俄

而雲霧所遮後霧散不知所之遺其黃書飄至

亭側進於帝帝令朔驗之曰此上界火珠經也

或曰連珠漢遺史

帝嘗見彗星東方朔折指星之木以授帝帝以

木指彗星星尋則沒也星出之夜野獸皆鳴別說謂之獸鳴星 洞冥記

部翰嘗遇織女降其室衣玄霄之衣霜羅之帔翹鳳金之冠躡瓊文九章之履張霜霧丹縠之幃施九晶玉華之簾轉會風之扇有同心龍枕翌日丹鈿書青縑一幅以寄翰 東方朔神異記

孫休永安二年將守質子羣聚嬉戲有異小兒忽來言曰三公鋤司馬如又曰我非人熒惑星也言畢上昇仰視若曳一疋練有頃沒後四年

而蜀二十六年而魏廢二十一年而吳平於是九服歸晉魏 吳蜀並戰國三公鋤司馬如之謂

也 晉書

司星奏曰三台星墜於蜀化為三井遣使人驗之撞麗譙鐘聲為度而汲之各使人候於井遂汲一而兩動 上

劉聰淫泆無度時有星隕平陽化為肉羣臣諫以淫色所致聰曰自是天家事於朕何干 十六國春秋

秦符生時太白犯東井有司奏東井秦之分也  
太白罰星必有暴兵起於京師生曰星入井者  
必將渴耳何所怪

晉書

晉建元十三年正月太史奏云有星見外國分  
野當有大德智人入輔中國符堅曰朕聞西域  
有鳩摩羅什將非此耶即遣外求之

神僧傳

晉大元中有妖星現帝普下諸國有德沙門精  
勤佛事令懺穰災曇敵乃祈誠冥感至六日旦  
見青衣小兒來悔過云橫勞法師是夕星退以

大和之末卒於山室屍猶生聚體綠色

僧慧紹為僧通法慈經苦行堅節後隨師僧要

止臨行招提寺常念佛恩之重誓欲捨身以報

剋日就山建八關齋會闔境奔赴雲滿山谷至

山紹自行香執燭煇薪入龕而坐誦藥王捨身

品火沿至額猶聞經聲大衆忽見一星大如斗

直下火中俄而升天紹嘗謂同學曰吾燒身處

當生梧桐木切莫伐之後三日果爾而生

並上

桓玄母馬氏嘗與同輩夜坐於月下見流星墜

銅盆水中忽如二寸火珠罔然明淨競以瓢接取馬氏得而吞之若有感遂有娠及生玄有光照室占者竒之故小名靈寶

晉書

容城令徐路善占候世宗時坐事繫冀州獄別駕崔隆宗就禁慰問路曰昨夜驛馬星流計赦即時應至隆宗遣人試出城候馬俄而赦至時

人重之

後魏書

源師字踐言為

郎攝祠部後屬孟夏以龍

見請寧時高阿

為錄尚書事謂為真龍出

見大驚喜問龍所在云作何顏色師整容云此

是龍星初見依禮禮記祭郊壇非謂真龍別有

所降阿那肱忿然俟色曰漢見多事強知星宿

祭事不行師出竊歎曰國家大事在祀與戎禮

既廢也其能久乎齊亡無日矣

北史

廣博物志卷之二

廣博物志

卷之二

四

高祖堂

廣博物志卷之三

隴西董斯張纂

上海高士煌訂

天道三

風

虹

雲

雨

雷

電

雪

霜

霧

露

霽

露

露

露

氣上薄為雨下薄為霧風其噫也雲其氣也雷其相擊之聲也電其相擊之光也風多則合速故雨大而疎風少則合遲故雨細而密其寒月則雨凝於上而因風相襲故成雪焉雹霰之流也陽氣暴上雨則凝結成雹焉太平之世雲則

五色而為慶三色而為禱露則結味而成其結  
 潤而成膏政多紕繆則陰陽不調風發屋雨溢  
 河雪至牛目電殺驢馬此皆陰陽相蕩而為稜  
 沴之妖也 春秋繁露

王者與臣無禮貌不肅敬則木不曲直而夏多  
 暴風風者木之氣也其音角也故應之以暴風  
 王者言不從則金不從革而秋多霹靂霹靂者  
 金氣也其音商也故應之以霹靂王者視不明  
 則火不炎上而秋多電電者火氣也其音徵也

故應之以電王者聽不聰則水不潤下而春夏  
 多暴雨雨者水氣也其音羽也故應之以暴雨  
 王者心不能容則稼穡不成而秋多雷雷者土  
 之氣也其音宮也故應之以雷 上

陰陽之氣偏則風俱則雷交則電亂則霧和則  
 雨陽氣勝則散為雨露陰氣勝則凝為霜雪陽  
 之專氣為雹陰之專氣為霰 大戴禮

人主之情上通於天故誅暴則多飄風枉法令  
 則多虫螟殺不辜則國赤地令不收則淫雨多

萬物尊天而貴風雨所以尊天者為其莫不受命焉也所以貴風雨者為其莫不待風而動待雨而濡也若使萬物釋天而更有所受命釋風而更有所仰動釋雨而更有所仰濡則無為尊天而貴風雨矣 管子

風猶人之有吹噓也雨猶人之有精液也雷猶人之有腹鳴也三者附於天地祭天地二者在矣人君重之故別祭必以為有神則人吹噓

液腹鳴當復食也月猶人之有目星辰猶人之有髮三光附天祭天三光在矣人君重之故復別祭必以為有神則人之食已復食目與髮也 論衡

調暢祥和天之怒氣也折揚奔厲天之怒氣也

黃帝風經

諸稽攝提條風之所生也 諸稽攝提天神之名也 通視明

庶風之所生也 通視天神也 赤奮若清明風之所生

也 赤奮若天神也 共工景風之所生也 共工天神也 諸



比涼風之所生也諸比天 阜稽閭闔風之所生

也阜稽天神也 隅強不周風之所生也隅強天窮奇

廣莫風之所生也窮奇天神也在 淮南子

條風至則出輕繫去稽留明庶風至則正封疆

修田疇清明風至則出幣帛使諸侯景風至則

爵位晉書涼風至則報地德祀四郊閭闔

戶至比晉書瑟不張不周風至則修宮室

繕邊城廣齊書則閉關梁決刑罰上

風究豫司冀橫晉書合晉書言之風汜也其氣博汜

而動物也青徐言風踧口開脣推氣言之風放

也氣放散也釋名

風氣者禮樂之使萬物之首也物非風不能熟

也風順則歲美風暴則歲惡樂動聲儀

出號令合民心則祥風至禮稽命徵

人君政訟平則祥風至宋均注曰卽景風也禮

威儀

鎮星黃時則祥風至禮斗威儀

猛風曰颶涼風曰颶微風曰颶小風曰颶風俗通

風或清明來久長不搖樹木枝葉離地二三丈者此有龍德在於下風或清明不及二三尺者此君子之風也上

太微天帝君曰九天真人呼風為浮金房在明霞之上九戶在瓊闕之內雲笈七籤

天官之書以正月朝占四方之風風從南方來者旱從北方來者湛東方來者為疫西方來者

為兵論衡

風高者道遠下者道近凡大風非常三日三夜

者天下盡風也一日二夜者六下半風也一日

一夜者千里抱朴子

裂葉風洞冥記

治風夏避赤風秋避白風冬避

黑風季竹傳

雷公江赫冲電母秀文英風伯方道彰雨師陳

華夫七籤

九真郡居風有風門常出風山海經

大荒之中有山曰鞠陵焉山有人名曰折丹處

東極以出入風

上○注折冊神人也

景公為長康將欲美之有風雨作公與晏子入

坐飲酒致堂上之樂酒酣晏子作歌云穗乎不

得獲秋風至今殫零落風雨之弗殺也太上之

靡弊也歌終顧而流涕張躬而舞公遂廢酒罷

役不果成長康

晏子

列禦寇鄭人御風而行常以立春日歸乎八荒

立秋日遊於風穴是風至即草木皆生去則草

木皆落謂之離合風

述異記

射的山南有白鶴山此鶴仙人取箭漢太尉鄭

弘嘗采薪得一遺箭頃有人覓弘還之問何所

欲弘患若耶溪載薪為難願旦南風莫北風後

果然故若耶溪風至今猶然呼為鄭公風

孔靈符會

稽記

吳真君嘗遇大風書符置屋上有青鳥啣去風

即止

續仙傳

齊神武時芒山之役風從西來入營李業興曰

小人風來當大勝後果驗

北史

隋文帝仁壽二年西河有胡人乘騾在道忽為  
 回風所飄并一車上千餘丈乃墜皆碎焉京房  
 易傳曰衆逆同志至德乃潛厥異風後二年漢  
 王諒在并州潛逆謀亂車及騾騎之象也升空  
 而墜顛沛之應也天戒若曰無妄動車騎終當  
 覆敗而諒不悟及高祖崩諒發兵反州縣響應  
 衆至數十萬月餘而敗隋書

煬帝汎舟忽陰風頗緊歎曰此風可謂跋扈將

軍大業拾遺○  
以下雲

雲之為言運也觸石而起謂之雲含陽而起以

精運也春秋說題辭

雲猶云云衆盛意也又言運也運行也釋名

雲者天地之本也河圖帝通記

冬至陽雲出箕如樹木之狀小寒合凍蒼陽雲  
 出氏大寒降雪黑陽雲出心立春青陽雲出房  
 如積水雨水黃陽雲出亢驚蟄赤陽雲出翼春  
 分正陽雲出張如積白鵠清明白陽雲出奎穀  
 雨大陽雲出張如車蓋立夏當雲出觜赤如硃

小滿上陽雲出七星芒種長陽雲出斗夏至少

陰雲如水波萃萃小暑雲五色出大暑陰雲出

南赤北蒼立秋濁陰雲出如赤繒處暑赤雲出

白露黃陰雲出秋分白陰雲出寒露正陰雲出

如冠纓霜降大陰雲出上如羊下如礮石立冬

陰雲出而黑大雪降陰雲出而分冬至日謹候

見雲送迎從其鄉來歲美民和易通卦

春有白鶴雲易說

人君乘水而王其政和平則景雲見也禮斗威儀

山雲艸莽水雲魚鱗旱雲烟火溇雲波水各象

其形類所以感之淮南子

雲外赤內青謂之商雲雨雲曰油雲雪雲曰同

雲

雲狀若有象馬以鬪名曰滑馬呂氏春秋

凡占長吏耕當視天有黃雲來覆車五穀大熟

青雲致兵白雲致盜烏雲多水赤雲有火東方朔外傳

至亂之國君相賊其雲狀有若犬馬若白鶴連

者上

赤雲如兔蜀國當富

京房易傳

有雲如蛟龍所見處將軍失魄有雲如鵠尾來

蔭國上三日亡

兵書

有雲如丹虵隨車後大戰殺將上

四方北斗中無雲惟河中有雲三枚相連如浴

豨三日大雨

黃子發雨書

四方有濯雨雲雲疾者立雨遲者雨少難至上

韓雲如布趙雲如牛楚雲如日宋雲如車魯雲

如馬

衛雲如犬周雲如車輪秦雲如行人魏雲如鼠

鄭雲如絳衣越雲如龍蜀雲如茵車

晉書

牂雲如狗赤色長尾為亂君為兵表上

九真華妃曰日者霞之實霞者日之精人唯聞

服日實之法未見其知霞之精也夫食霞之精

甚秘致霞之道甚易此謂體生玉炁霞映上清

之法也

真誥

崑崙有雲色從下望之如城闕之象四面有風

群仙常駕龍乘鶴遊戲其間四面風者言東南

西北一時俱起也又有祛塵之風若衣服塵汚者風至吹之衣則淨如浣濯甘露濛濛似霧著草木則滴瀝如珠亦有朱露望之色如丹著木石赭然朱雪灑焉以瑤器承之如飴

拾遺記

員嶠東有雲石廣五百里駁駱如綿扣之片片則蔚然雲出

上

霍山南嶽有雲師雨虎雲師如蠶長六寸似兔雨虎如蛹長七八寸似蛭雲雨之時出在石上

開山圖

鄭有不毛山上有無為之君分布雲雨於九州之內

上

上清玉房生七寶之雲雲色七重其氣九扇以童子辟非童子宣彌得乘此寶雲上入玉清之天也而辟非者太微之內神宣彌者玉清之神女若兆能離合百神間關帝一變化九魂混暢五七者則辟非可賴宣彌可致七度死厄三光所利五老延日以曲照太上三便以相入矣三便者太上金房之名也

雲笈七籤

炎帝時有流雲灑液是謂霞漿服之得道後天而老

拾遺記

黃帝戰涿鹿之野有五色雲氣金枝玉葉止於帝上有花葩之象因作華蓋

路史

黃帝之將興黃雲升於堂文命之侯玄龍御雲

天命於湯白雲入房

春秋孔演圖

楚昭王之時有雲如飛鳥夾日而飛三日昭王患之使人乘驛東而問諸太史州黎州黎曰將虐於王身以令尹司馬說焉則可令尹司馬聞

之宿齋沐浴將自以身禱焉王曰止楚國之有不穀也由身之有匈脇也其有令尹司馬也由身之有股肱也匈脇轉之股肱庸為去是人也

說苑

楚有蒼雲如霓圍軫七蟠中有荷斧之人向軫而蹲於是楚唐史畫遺灰而雲滅故曰唐史之

策上滅蒼雲

春秋文耀鉤

東方朔乘雲飛去仰天霧覆之不知所在

漢武內傳

帝寢靈莊殿召東方朔於青綺牕不隔綈紈重



幙問朔曰漢承庚運火德以何精瑞為祥應朔  
 跪而對曰臣嘗過吳明之墟是長安東過扶桑  
 七萬里有及雲山山頂有井雲起井中若土德  
 王黃雲出火德王赤雲出水德王黑雲出金德  
 王白雲出木德王青雲出此皆應瑞德也帝曰

善述異記○

雨者天之施也河圖帝通記

雨羽也如鳥羽動則散釋名

候月知雨多少八月一日二日三日凡月色黃

者其月少雨月色青者其月多雨常以五卯日  
 候西北有雲如群羊者即有雨至矣冬戊巳春  
 辰巳日雨蝗蟲食禾稼立春雨傷五禾立秋日  
 雨害五穀常以戊巳日日入時出時欲雨日上  
 有冠雲大者即多雨雲小者少雨師曠占

凡候雨以晦朔弦望雲漢四塞者皆當雨東風  
 曰雷雨暴有黑雲氣如船覆於日下當雨有黑  
 雲氣如斗牛彘當雨暴有異雲如水牛不三日  
 大雨黑雲如群羊奔如飛鳥五日必雨雲如浮

舩皆雨北斗獨有雲不五日大雨四望見青白雲名曰天寒之雲雨微蒼黑雲細如杼軸蔽日月五日必雨雲如兩人提鼓持桴皆為暴雨

京房易飛候

一歲三十六雨天地之氣宣十日小雨應天文

也十五日大雨以斗運也

春秋說題辭

大將軍行雨濡衣冠是謂灑兵其師有慶

魏武帝兵

書摘要

夫軍出逢天無雲而雨此天泣也軍沒不還

兵法

占天雨否外卦得陰為雨得陽不雨其爻發變

得坎為雨得離不雨坎化為巽先雨後風

周易集林

雜占

朱鬘浮於波上必大雨

淮南子

焦明至為雨備焦明水鳥也

樂動聲儀

文襄遊東山雲起恐雨筮遇剥李業興曰坤下

艮上為山山出雲故知有雨吳遵世曰坤為地

王尅水故知無雨文襄曰遵世若著賞絹十不

者罰杖十業興若著無賞不著杖十業興曰同是著何獨無賞文襄曰遵世會我意也須臾雲散二人各受賞罰北齊書

攝木生江上有寄枝高三四丈生毛一名楓子

天旱以泥塗之即雨爾雅

西海上有人乘白馬朱鬣白衣朱冠從十二童

子馳馬如飛名曰河伯使者其所至之國雨水

滂沱神異經

耒陽縣有雨瀨此縣時旱百姓同壅之則甘露

普降若一鄉獨壅雨亦偏隨方所其信符刻太平

御覽

湘東有雨母山山有祠壇每祈禱無不降澤以

是名之荊州記

絳北有陽石山有神龍池黃帝時遣雲陽先生

養龍於此國有水旱不時即祀池請雨遁甲開山圖

張元賓得僊入華陽洞為理禁伯其職主水蓋

雨官也真誥

君恚恚怒無雲而雨河圖秘徵

三軍將行其旗整然若雨是謂天露三軍失徙將軍雨甚是謂浴屍先陣者敗魏武帝兵書摘要

春旱求雨合縣邑以水日令民禱社家祀戶祝無伐名木無斬山林暴巫聚地八日於邑東門之外為四通之壇方八尺植蒼繒八其神共工祭之以生魚八玄酒具清酒膊脯擇巫之清潔辯言利辭者以祝祝齋三日服蒼衣先再拜乃跪陳陳已復再拜乃起祝曰昊天五穀以養人今五穀病旱恐不成敬起進清酒膊脯再拜請

雨雨幸大澍奉牲禱以甲乙日為大蒼龍一長八丈屈中央為小龍七各長四丈於東方皆東鄉其間相去八尺小童八人皆齋三日服青衣舞之田嗇夫亦齋三日服青衣而立之諸里社通之於閭外之溝取五蝦蟇錯置秘中池方八尺深二尺置水蝦蟇焉具清酒膊脯祝齋三日取蒼衣拜跽陳祀如初取三歲雄雞三歲豬皆燔之於四通神宇令闔邑里南門置水其外開北門其豶豬一置之於里北門之外市者亦置

一豨豬聞鼓聲皆燒豬尾取死人骨埋之開山淵積薪而燔之決通道橋之壅塞不行者夏求雨令邑以水日家人祝竈無舉土功更大浚井暴金於壇曰杼於術七日爲四通之壇於邑南門外方七尺植赤繒七其神蚩尤祭之以赤雄雞七玄酒具清酒膊脯祝齋三日服赤衣拜跪陳祝如春辭以丙丁日爲大赤龍一長七丈居中央又爲小龍六長各三丈五尺於南方皆南鄉其間相去七尺壯者七人皆齋二日服赤衣

而舞之司空嗇夫亦齋三日服赤衣而立之而通之間外之溝取五蝦蟇錯置里社之中池方七尺深一尺酒膊祝齋衣赤衣拜跪陳祝如初取三歲雄雞豨豬燔之四通神宇開陰閉陽如春季夏禱山陵以助之令縣邑壹徒市於邑南門之外五日禁男子無得行入市家人祠中雷無興土功聚巫市爲益四通之壇於中央植黃繒五其神后稷祭之以五玄酒具清酒膊脯令名爲祝齋三日衣黃衣皆如春祠以戊巳日

爲大黃齋一丈居中央又爲小龍五各長  
二丈五尺於方皆南鄉其間相去五尺丈夫  
五人齋三日服黃衣而舞之五人亦齋三日衣  
黃衣而立之亦通社中於閭外溝取蝦蟇池方  
五尺深一尺他皆如前秋暴巫至九日無舉火  
事煎金器家人祠門爲四通之壇於邑西門之  
外九尺植白繒九其神大昊祭之桐木魚九玄  
酒具清酒膊脯衣白衣他如春以庚辛日爲大  
白龍一長九丈居中央爲小龍八各長四丈五  
尺於西方皆西鄉其間相去九尺鰥者九人皆  
齋三日服白衣而舞之司亦齋三日衣白衣  
而立之設墓池方九尺深一尺他皆如前冬儻  
龍六日禱於名山以助之家人祈井無壅水爲  
四通之壇於邑北門之外方六尺植黑繒六其  
神玄冥祭之以黑狗子六玄酒具清酒膊脯祝  
齋三日衣黑衣祝禮如春以壬癸日爲大黑龍  
一長六丈居中央爲小龍五各長三丈於北方  
皆北鄉其間相去六尺之者六人皆齋三日衣

黑衣而舞之尉亦齋三日屏去衣而立之蝦蟇  
 池如春四時皆水為之必取潔土為之結蓋  
 龍成而發之四時皆以天子之日令吏民夫婦  
 皆偶處凡求雨之大變丈夫欲藏匿女子欲和  
 而樂神音又曰開神山神淵積薪夜擊鼓譟而  
 燔之為其卑也春秋繁露

天及龍皆能降雨何以取別天雨細霧下者是  
 龍雨麤雷者是又阿修羅共天鬪時亦能降雨  
 雨有二種有喜雨有瞋雨若雨和調者是歡喜

雨若與雷電霹靂者是瞋恚雨

分別功德論

太白竊織女侍兒梁玉清衛承莊逃入小仙洞  
 天帝怒命五嶽搜捕太白歸位衛承莊逃焉玉  
 清有子名子休玉清謫於北斗常春其子乃配  
 與河伯驂乘行雨子休每至小仙洞耻其母淫  
 奔之所輒回馭不經故此地常少雨東方朔  
 周穆王時天下連雨三月穆王吹笛其雨乃止

述異記

魯僖公時雨澤不澍比於九月率群臣禱山川

以六過自讓退舍南郊天立大雨

春秋考異郵

墨子歸過宋天雨庇其間中守閭者不內也故

曰治於神者眾人不知其功爭於明者眾人知

之墨子

汝南周獲善占天文為郡門下椽鮑昱為汝南

太守時郡境天旱昱自往問何以致雨獲曰恐

罷三部督郵明府當自北出到四十里雨可致

也昱從之果得大雨

司馬彪續漢書

管輅與倪清河刻雨期倪未信輅曰十六日壬

子直滿畢星中已有水氣水氣之發動於卯辰

此必至之應也昨檄召五星宣布星符刺下東

井告命南箕使召雷公電父風伯雨師群岳吐

陰眾川激精雲漢垂澤蛟龍合靈燁燁朱電吐

咀杳冥殷殷雷聲噓吸雨靈習習谷風六合皆

同咳唾之間品物流形天有常期道有自然不

足為難也向暮果有良風鳴鳥日未入東南有

山雲樓起黃昏之後雷聲動天到一鼓中星月

皆沒風雲竝與玄氣四合大雨河傾

管輅列傳



馬均大巧能削竹作人語時天下大旱人皆將酒與此竹人語天下須臾雨也郭子

文虔字仲孺爲郡功曹時霖雨廢民業太守憂悒召虔補戶曹掾虔奉教齋戒在社三日夜夢

見白頭翁謂曰爾來何遲虔具白所夢太守曰昔禹夢青繡衣男子稱滄水使者禹知水脉當

通若掾此夢將其兆也明日果霽長沙耆舊傳

太康中都界大旱束皙爲邑人請雨三日而雨注衆謂皙誠感爲作歌曰束先生通神明請天

三日甘雨零零我黍以育我稷以成何以疇之

報束長生

晉書

晉周暢性仁惠和篤穆帝時爲河南尹永和二年夏旱久禱無雨因收塋枯骨萬餘乃大雨後位至光祿勳上

宋大明六年天下尤旱禱祈山川累月無驗世祖請求邾跋陁羅三藏法師祈雨跋陁卽往北潮釣臺燒香祈請不復飲食默而誦經密加秘咒明日晡時西北雲起初如團蓋日在桑榆風

震雲合連日降雨 法苑珠林

前樂後憂厥妖天雨羽又曰邪人進賢人逃天

雨毛 京房易傳○又易妖云  
天雨毛羽貴人出走

內淫亂百姓勞苦則雨土君去祿信表厥妖雨

草雨五穀人相食 上

天雨墨君臣無道讒人進 災祥集

雨杼曰饑舖贈穰 占鏡

雨筋大饑 上

雨綿絲絮皆兵喪 內記

雨爵錫為饑荒狀如甘露而黃 上

雨血君殺雨膏忠輔多貪內記云天雨膏師敗

雨肉將易君 占鏡○紂不年  
天雨肉

天雨水銀是謂鵲祖不出三年兵喪並起云國

失王 內記

雨水多風雨葉君有咎 占鏡

河圖云怪目勇敢兩童天雨刀於楚之邦謂項

羽春秋演孔云八政不中則天雨刀

雨鼈兵喪

夏禹時天雨金古詩云安得天雨金使金賤如

土述異記○河間有雨鉛城漢世天雨鉛錫於此○王莽時雨五銖錢既而至地悉為龜兒

京房云雨冰大疫桀末年冰生於朝梁赧

二年齊地雨冰廣者六尺漢栢時京師雨冰張

駿二年二月雨冰片如續

殷紂時十日雨土於亳尚書中候

紂末年雨石皆大如甕瓦

趙簡子問於翟封荼曰吾聞翟雨穀三日信乎

曰信又聞雨血三日信乎曰信又聞馬生牛牛

生馬信乎曰信簡子曰夫哉妖亦足以亡國矣

對曰雨穀三日重風之所飄也雨血三日擊鳥

擊於上也馬生牛牛生馬雜牧也此非翟之妖

也簡子曰然則翟之妖奚也對曰其國數蔽其

君幼弱其諸卿債其大夫比黨以求祿爵其百

官肆斷而無告其政令不竟而數化其士巧貪

而有怨此其妖也說苑○又國策云樂毅伐齊

沾衣○漢書云哀帝時山

陽雨血後二年王莽擅朝

惠成王七年天雨碧於鄭竹書紀年

梁惠成八年雨骨於赤鞮後國饑兵疫內記云是謂陽消

漢武帝時廣陽縣雨麥 述異記

武帝時天雨白毛時征役繁興戶口凋弊元帝

嘗雨草而葉相摻結大如彈丸時帝外氏權盛

成帝時雨魚王氏專政 搜神記 ○十六國春秋云蜀李期末年宮中雨

魚色黃是年為李壽所殺

漢宣帝時江淮饑饉人相食雨穀三秦魏地亡

穀二十頃 又吳桓王時金陵雨五穀於貧民家富者則不雨矣

宣帝元康四年南昌雨荳亮武建武三年春縑

一疋易一斗豆夏埜生旅豆民收取之明帝永

平十八年下邳雨大豆似槐實 古今注

漢永和年長安雨綿皆白 伏虔古今注

魏武帝末年鄴中雨五色石 述異記

漢桓帝建和三年秋七月北地雨肉似羊肋或

大如手是時梁太后攝政梁冀專權 搜神記

魏時河間王子元家雨中有小兒八九枚墮於

庭前長六七寸許自言家在河東南為風所飄

而至於君庭與之言甚有所知如史傳所述  
上  
梁武同泰年雨灰色黃時帝信佛法蔽賢絕道  
後有侯景之亂梁簡文時雨黃沙其年人相食

隋書

梁武大同元年雨黃塵如雪攬之盈掬

大同中雨襍色寶珠虞寄上瑞雨頌

隋仁壽年在仁壽宮天雨花

同上。以下雪

雪綏也水下遇寒氣而凝綏綏然也

釋名

霰星也水雪相搏如星而散也

上

盛陰雨雪凝滯而水寒陽氣薄之不相入則散  
而為霰盛陽雨水溫煖而湯熱陰氣脇之不相  
入則轉而為雹霰者陰脇陽也雹者陽脇陰也

洪範五行傳

行傳

北風雨雪有凍人天子作黃竹詩以哀民

穆天子傳

曾子耕泰山之下天雨雪凍旬日不得歸思其

父母作梁山吟

琴操

管寧家貧久雪陰霾不開謂友人曰吾恐凍斷

三足烏脚寧不足憂

俗說

焦先野火燒其廬先因露寢遭大雪至先祖臥不移人以爲死就視如故高士傳

大明中元日雪花降殿庭右將軍謝莊下殿雪

暴衣白上以爲嘉瑞群臣皆作雪花詩宋書○以下霜

霜喪也其氣慘毒物皆喪也釋名

豐山有九鐘霜降而自鳴山海經

廣延國去燕七萬里其地常雨青雪冰霜色皆

紺碧拾遺記

桀無道地吐黃霧夏隕露冬下霜命曆序以下霧

天氣下地不應曰冱地氣發天不應曰霧爾雅孫炎注

十月癸巳霧赤爲兵青爲殃望氣經

六月三日有霧歲熟上

曲江縣有銀山常多素霧湘川記

大霧君迷或云霧四時則時多隱士京房妖古

王之千歲者行遊諸國其所居國必三日變爲

日中之霧地鏡圖

白霧四面圍城不出百日大兵至城下抱朴子

服霧法常以平日於寢靜之中坐臥任已先閉

目內視髣髴如見五臟畢因口呼出氣二十四  
 過臨目為之使目見五色之氣相繞纏在面上  
 鬱然因又口內此五色氣五十過畢咽唾六十  
 過畢乃微呪曰太霞發暉靈霧四遷結氣宛屈  
 五色洞天神煙合啟金石華真藹鬱紫空鍊形  
 保全出景藏幽五靈化分合明扇虛時乘六雲  
 和攝我身上昇九天畢又叩齒七通咽液七過  
 乃開目事訖此道神妙又神州玄都多有得此  
 術者爾可行此法邪久行之常乘雲霧而遊真誥

伊尹卒年百有餘歲天霧三日

帝王世紀

後主禎明三年元日大霧四塞人人鼻氣皆

辛

酸 陳書○  
以下下露

露慮也覆慮物也

釋名

物之不朽者莫如金氣之清者莫如露

曹植論

君治政則軒轅之精散為甘露

禮斗威儀

武露布文露沉

甘露降其國布散者人尚  
武沉重者人尚文春秋緯

甘露降者老得敬則松柏受之尊賢容眾則竹  
 葦受之甘露者仁澤也其凝如脂其甘如飴名

曰天酒中興書

聖德上及太清下及太寧中及萬靈則膏露下

子 鴨冠

諸沃之楚搖山之民甘露是飲不壽者八百歲

山海經

勒畢國人長三丈有翼善言語戲笑因名善語

國常飲丹露為漿丹露者日初出有露汁如珠

也洞冥記

明帝永平十七年夢見先帝炎烈皇后夢覺悲

不能寐明口上陵其日甘露降於陵樹帝令百

官採之帝伏御牀流涕也後漢書

皇甫謐幼時有甘露降其柳樹謐每以食之謂

蜜也晉書

新蔡鄭敬都尉高懿廳前槐樹有白露類甘露

懿問掾屬皆言是甘露敬曰明府德政未致其

露但樹汁耳懿不悅稱疾而去汝南先賢傳

虹攻也純陽攻陰氣也釋名

霓齧也其體斷絕見於非時此災氣也傷害於



物如有所食齧也

鎮星散為虹霓主肉淫又霓者氣也起在日側

其色青赤白黃 河圖稽 耀鈞

日傍氣白者為虹日傍青赤者為霓 尚書考 靈曜

霓者斗之亂精也斗失度則投霓見 宋均注曰 投應也

春秋演 北圖

天弓虹也又謂之帝弓明者為虹暗者為霓 白 虎

通

九女竝譌則九虹並見 感精符

蟬竦充側佞人傾惑 焦氏易林

虹當雙見鮮盛者雄其暗者雌 埤雅

天一氣則成虹地二氣則泄藏 淮南子

攻城有虹從南方入飲城中者從虹攻之勝白

虹遶城不匝從虹所在擊之勝謹守其缺賊乃

從其地破走 黃帝出軍決

古者有夫妻二人荒年菜食而死俱化成青絳

故俗呼美人虹 異苑

白虹貫牛山管仲諫曰無近妃宮恐失權齊侯

大懼去色黨更立賢輔

春秋文曜鉤

崔文子學道於王子喬子喬化為白蜺而嬰蒞

持藥與之文子驚怪引戈擊蜺因墮其藥俯而

視之子喬之尸也

王逸離騷註

郎顛上章曰竊見今月十四日乙卯時白虹貫

日見日旁氣色白而純者多白虹貫日中者侵

太陽也見於日旁政變常也易傳曰公能其事

序賢進士後必有喜反之則白虹貫日以甲乙

見則譴在中台自司徒居位陰陽多謬宜黜天

意

後漢書

靈帝時有黑氣墮北宮温明殿東庭中上問蔡

邕對曰所謂天投蜺也

上

晉義熙初晉陵薛願有虹飲其金澳須臾喻響

便竭願輦洒灌之隨投涸便吐金滿釜

異苑

李特長子盪字仲乎少子雄字仲雋初特妻羅

氏任雄夢雙虹自地升天一虹中斷羅曰吾二

兒有先亡者有貴者後雄王蜀

華陽國志

太原温湛婢見一嫗向婢流涕無孔竅婢駭怖

告湛湛遂抽刀逐之化成一物如紫虹形宛然  
長舒上沒霄漢 異苑

有黑虹下樂輯營少日輯病卒 述異記

劉義慶在廣陵臥病食粥忽有白虹入室就食  
其粥義慶擲器於階虹遂作風雨聲響撼庭戶

良久不見 獨異志

故越王無諸舊宮上有大杉樹空中可坐十餘  
人越人夏世隆高尚不仕常之故宮因雨霽欲  
暮斷虹飲於宮池漸漸縮小化為男子入樹良

久不出世隆怪異乃召隣之年少十數人往視  
之見男子為大赤虵盤繞眾懼不敢逼而少年  
遙擲瓦礫聞樹中有聲極異如婦人之哭須臾  
雲霧不相見又聞隱隱如遠雷之響俄有一彩  
龍與赤鵠飛去及曉世隆往觀之見樹中紫虵  
皮五色蛟皮欲取以歸有火生樹中樹焚蕩盡  
吳景帝永安三年七月也 東甌後記

正光元年首陽溪有虹化為女宇文顯進之帝  
逼幸之不得異聲如鐘復為虹而去未幾帝崩

○以下  
雷電

東方之氣雷南方之氣電西方之氣虹霓北方

之氣雲雨雹霰雪造化權輿

雷碾也如轉物有所碾雷之聲也釋名

電殄也乍見則殄滅也上

河圖謂雷曰玉虎鳴雞跖集

春雨初起其音恪恪霹靂者所謂雄雷旱氣也

其鳴依依音不大霹靂者謂之雌雷水氣也師曠占

豐界音界之幹晴之夔音雷礲礲音礲電烜烜音當葛

傳曰界之幹日之轉也晴之夔日之動也雷礲

礲其聲震也電烜烜其光睽也昔王由是動干

戈耀兵威元包仲陽

天冬雷地必震教令撓則冬雷民饑易妖占

夫雷人君相也入能除害出能興利上

東方有電名曰無厚南方有電名曰順流西方

有電名曰墮光明北方有電名曰百生樹無厚

與墮光明相觸相對順流與百生樹相觸相對

起世經

東方光明電王名阿揭多南方光明電王名阿  
羝嚕西方光明電王名主多光北方光明電王  
名蘇多末尼善男子女聞是名字及知方處者  
遠離一切怖畏雷電災橫之事

雷部鬼神晝勞夕役動有搖楚大則考戮屑雲  
雕雷無有已時檄龍命鴉以息彼作玉樞經

謝仙者雷部中鬼也夫婦皆長三尺其色如玉  
掌行火於人間酉陽雜俎

新山周迴十里樵人常聞雷聲在山下俯看初

霧大如扇湏臾雷霆彌漫數數百里安成記

楚商梁出遊九臯之澤覽漸水之臺引梁置周  
於荆山臨曲池而漁疾風震電奄冥大水  
四起霹靂下臻矍然而驚其僕曰孤虛設張八  
宿相望熒惑干角五星失行此國之大變也君  
其返國矣於是商梁返室援琴歎之韻聲激發  
象霹靂之聲故曰霹靂引或曰商梁卽楚莊王  
聲誤也琴操

秦穆公出狩至於咸陵天震大雷下有火化爲

白雀銜綠丹書集於公車

尚書中候

子路感雷精而生尚剛好勇親罹衛難結纓而

歿孔子每聞雷鳴中心惻怛

王充論衡

秦二世元年天無雲而雷雷陽也雲陰也有雲

然後有雷象君臣也故雲雷相託陰陽相合也

今二世不恤人人臣叛之故無雲而雷也

太平御覽

神武閱馬北牧道逢暴雨大雷震地火燒浮圖

神武令薛孤延視之延案稍直前大呼燒浮圖

延火遂滅延還鬚及馬尾鬣皆焦神武歎其勇

决曰延乃能與霹靂鬪

北史

廣博物志卷之三 終

博物志

卷之三

